

DOMENIE XXVII «VIE PAL AN»

Antifone di jentrade cf. Est 4,17

Dutis lis robis a son sot de tô paronance, Signôr, e nissun nol pues fâti cuintri.
Tu tu âs fat il cîl e la tiere e ducj i spetacui ch'a son sot dal cîl.
Tu tu sês il Paron di dutis lis robis.

Colete

Diu onipotent e eterni,
che, cu la bondance dal to boncûr,
tu vâs plui in là dai merits e des preieris di chei che ti suplichin,
spant sore di nô la tô misericordie:
in mût di perdonâ ce che la cussience e à pôre
e zontâ ce che la preiere no olse.
Pal nestri Signôr Gjesù Crist to Fi, ch'al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Ab 1,2-3; 2,2-4

Il just al vivarà pe sô fedeltât.

Dal libri dal profete Abacuc
Fin cuant, Signôr, varaio di clamâ jutori
cence che tu mi scoltis?
Varaio di berlâti: «Violence!»
cence che tu mi salvis?
Parcè mo obleâmi a viodi la tristerie
e a scugnî cjalâ la opression?
Denant dai miei vôi a son robariis e violence;
e je barufe e la sconcuardie e vinç.
Il Signôr mi à rispuindût e mi à dit:
«Scrîf la vision,
incidile sun breutis,
par ch'a corin a leile.
Parcè che la vision e rivuarde une date,
e spiete une fin, no fale;
se s'intarde a vignî, spietile,
parcè che e vignarà impreteribil, no s'intardarà».
Ve: chel che nol à il cûr just al socomp;
il just invezit al vivarà pe sô fedeltât.
Peraule di Diu.

SALM RESPONSORIÂL dal Salm 94

R. Fâs che o scoltin la tô vôs, Signôr.

Vignît, batìn lis mans al Signôr,
fasìn fieste a la crete che nus pare;
presentinsi denant di lui ringraziantlu,
fasìn fieste cun cjantis di ligrie. **R.**

Vignît, butinsi a schene plete
denant dal Signôr che nus à creâts,
parcè che al è lui il nestri Diu,

e nô, il popul che lui al passone,
il trop de sô malghe. **R.**

Joi, se vuê la sô vôs o scoltassis:
«No stait a inrochîsi tal vuestri cûr come a Meribe,
come tal desert te dì di Masse,
là che mi an tirât a ciment i vuestris paris,
a an volût provâmi,
ancje se a vevin viodudîs lis mês voris». **R.**

SECONDE LETURE 2 Tm 1,6-8.13-14

No sta vergognâti di testimonê nistri Signôr.

De seconde letare di san Pauli apuestul a Timoteo
Benedet, ti racomandi di tornâ a fâ sflameâ il don di Diu ch'al è in te midiant de imposizion des mê
mans. Di fat Diu no nus à dât un spirt di timidece ma di fuarce, di amôr e di sintiment. No sta
vergognâti alore di testimonê nistri Signôr e ancje me ch'o soi in preson par lui, ma patîs invezit
cun me pal vanzeli confidant te fuarce di Diu.

Cjape come spieli lis sanis dutrinis che tu âs sintudîs di me, te fede e tal amôr ch'al è in Crist Gjesù.
Ten cont dal bon depuesit midiant dal Spirtu Sant ch'al vîf in nô.

Peraule di Diu.

CJANT AL VANZELI Fil 2,15-16

R. Aleluia, aleluia.

Lusît come stelis tal mont,
tignint alte la perauale di vite.

R. Aleluia.

VANZELI Lc 17,5-10

S'o vassis fede!

Dal vanzeli seont Luche

In chê volte, i apuestui i diserin al Signôr: «Fâs cressi la nestre fede!». Il Signôr ur rispuindè: «S'o
vassis fede come un grignel di senape, o podaressis dîi a di chest arbul: Gjave lis lidrîs di chest teren
culî e va a plantâti tal mâr, e lui us scoltarès.

Cui di vualtris, s'al à un famei che al è a arâ o a passonâ il trop, i disaraial cuant che al tornarà
dongje dal cjamp: Ven chi svelt e sentiti in taule? No i disaraial invezit: Preparimi la cene; tiriti sù
la vieste e servîs in taule, par che jo o puedi mangjâ e bevi, e dopo tu podarâs mangjâ e bevi ancje
tu? Si sintaraial forsît obleât cul famei dome parcè che al à fat ce che i jere stât comandât? Cussì
fasêt ancje vualtris. Cuant che o varês fat propit dut ce che us è stât ordenât, disêt: O sin fameis che
no valin nuie. O vin fat dome ce che o vevin di fâ».

Peraule dal Signôr.

Su lis ufiertis

Acete, Signôr, ti preîn,
il sacrifici che tu stes tu nus âs comandât
e, cui misteris sants ch'o celebrîs par dovê di suditanche,
indegniti di santificânus adimplen cu la tô redenche.
Par Crist nistri Signôr.

Antifone a la comunione Lam 3,25

Il Signôr al è bon cun chel ch'al spere in lui,
cu l'anime che lu cîr.

Daspò de comunion

Diu onipotent, danus di cjàpâ sostentament
e spirt midiant dai tiei sacraments,
in mût di trasformâsi in chel ch'o ricevìn.
Par Crist nestri Signôr.